

mane di l'oppressori à quelle di i sottumessi. I picciotti siciliani in arme aduniti à I Mille, metteranu u terrore in le cità tenute da e truppe reale. U rughju di l'invadiu garibaldinu ghjunghjerà sin'à Palermo.

Ma restava Palermo. È Palermo dispunia d'una forte difesa benissimo prutetta da i rampali di Forte Castellamare è di Palazzo Reale. Isse piazze forte eranu armate di cannoni. I trè mila omi di Garibaldi averanu à fà à a truppa di u generale Lanza ch'avia rimpiazzatu à Landi, disfattu à Calatafimi. Questu dispunia di vinti mila omi, suldati di mistieru, ben armati è prutetti da i so bastioni. In issu mentre i so battelli in portu tiravanu di cannone senza arretta. Ma pocu à pocu, Lanza accintu è tagliatu di ravitagliamentu, dumanderà una treva è Ziu accetterà vulinteri. Ellu dinù avia bisognu di rifà pruvista di munizione.

Lanza riceverà rinforzi ma tutta a cità era in rivolta. Palermittani s'eranu accolti in li so carrughji daretu à l'imbarcate di mille trastuli impussibbili à francà. Ùn restava più à e truppe Burbone chè d'imbarcà per passà à Messina. Ciò ch'elle feranu sottu à u cuntrollu di i garibaldini ch'èranu venuti à prutegge li da l'ira di i Palermittani. Ci vulerà à cuntà à belli tredici ghjorni per imbarcà i vinti mila suldati Burboni, dirrotti è vergugnosi.

« Eroe d'una fantastica ventura » scriverà Victor Hugo.